

ARVIER

Coudi la couleue di joé di méinó pou tchandjé aprì leue nèissance ?

Pe eundin-é la couleue di joé no aitsèn halla partia colorée que se queurie *iris*.

Deun l'iris di joé lèi son de sellule pigmantéye (reutse de sostanse colorée) que se queurion *mélanosite* ; son fran heutte sellule a caractérisé la couleue di joé.

Le *mélanosite* produison an sostanse de couleue ros scuu, que l'a non *mélanina* (la mima sostanse ou pimàn, que baille la couleue a la pi é i pai de nouho coo).

Can la prézanse de hise *mélanosite* l'è ota, l'iris di joé l'a an couleue bruna ou naa ; can i contréo n'en po de *mélanosite* l'iris pren an couleue griza/perse, que l'è po d'otro que la couleue di sellule de l'iris, vuye eun trasparanse.

An pitchouda cantitò de *mélanosite* baille an couleue dzona ; l'è a coza de hi dzono que, eun se micllèn avouì la couleue persa, n'en totte le difiente tonalitò de couleue, di vèe canque i ros.

Le méinó can nisson l'an soèn le joé perse, vu que deun leue iris y è pounco la prézanse di *mélanosite*.

Avouì lo ten le *mélanosite* comenchon a produire leue pimàn é l'iris tsandze de couleue.

A la nèissance l'è po fasilo eundin-é la couleue définitiva di joé : eun tou ca, se lo mèinó l'a dza le joé teup, l'è bièn probablo que lèi restèyon scuu.

Se, i contréo, la couleue di joé l'è cléa, deun le premi maise de via heutta pou tchica pe cou gnaì pi teuppa.

Aprì le chouì maise/eungn an, la couleue tsandze pomé, mi deun le premi dou-z-àn de via serten-ie tonalitò son pounco bièn definie.



lo gnalèi



Région Autonome
Vallée d'Aoste
Regione Autonoma
Valle d'Aosta

Assessorat de l'Éducation
et de la Culture
Assessorato Istruzione
e Cultura

Tiré de :

www.cybersciences.com

Texte publié en 2008 dans « Mon Clocher » Paroisse de Saint-Sulpice - Arvier

Collaborateur de Arvier pour la traduction : **Daniela Millier**

La transcription a été soignée par le Guichet Linguistique

Mise à jour de la graphie : octobre 2013